

O LE MAOTA AOA O LE FAAMASINOGATONU

Risivani 2023

Mo Bahá'í uma o le Lalolagi

Uo peleina e,

1. Ua matua fa'atumuliaina o matou loto i le fiafia e tuuina atu lenei malelega i se fa'alapotopotoga e maoa'e lona tulaga tamali'i ma le maumausalī ua talafeagai ma le fa'amoemoega taualoa ua valaauina i ai. E maoa'e, e maoa'e naua le telē o lo matou alofa mo outou, ma fa'agaetiaina o matou agaga i le molimauiina o a outou taumafaiga mamā a'ia'i ma le fa'atoina e ola i se olaga o loo atagia ai A'oa'oga a Bahá'u'lláh ma mauvaega i vai o le fa'aolataga o Lana Fa'aaliga i se lalolagi o loo matua galala. O lo outou agaga fa'amisiona e ausia se fa'amoemoega maualuga o loo ua matua manino mai lava. O le fa'alautelega ma le fa'amautu'uga, auunaga mo le soifuaga lautele ma le auai i fefa'asoa'iga i mataupu a le sosaiete o loo fa'asolosolo lelei lava, ma o le auiluma fetala'i o nei gaioiga uma i le tulaga fa'a-le-kalasa ua fa'asilisiliina nei lona tino mai. E leai lava se nofoaga o loo manino ai nei vaaiga sei vagana nofoaga o loo maitauina ai se faitau aofai fa'atuputupula'ia o tagata o lo'o auai i le tele o ituaiga eseese o gaioiga o loo ua taitasi ona aveva ma auala e fa'amatu'u atu ai malosiaga o le Fa'atuatuga mo le fausiaina o le sosaiete.

2. I le sefululua masina ua mavae atu nei talu mai le amataga o le Fuafuaga Iva Tausaga, ua matou fiafia lava e vaaia le fa'aosofiaina ma le u'unaiaina o uo i lenei galuega fa'akelope tele fa'aleagaga ma ua fa'amalosiaina ai ni laina o gaioiga fa'apitoa. O le ulua'i la'asaga ua ave iai le fa'amuamua o le galuea'ina lea o fuafuaga ina ia mautinoa ai le manu a'e, i atunuu ma itulagi taitasi, o se kalasa ua ausia le ma'amaila lona tolu: o se nofoaga o loo auai ai se aofaiga toatele o tagata o loo galulue fa'atasi ma faisaofoaga atu i le siitiaina o le soifuaga o se fa'alapotopotoga uluola. O le manatunatu pea i le sini o lenei periota e lua sefulu lima tausaga ina ia ausia e kalasa taitasi uma lava se polokalame o le ola atia'e ua ausia le tulaga telelise, ua tu'uvaa atu nei foi tagata talitonu e tatalaina kalasa fou i le Fa'atuatuga ma fa'amalosiaina a latou taumafaiga i kalasa o loo ua iai nei se polokalame o le ola atia'e. Ua iai nei se malamalama'aga lautele i avanoa e paionia ai i vaega uma o le lalolagi – o le to'atele o agaga o loo latou mafaufau pe faapefea ona tali atu i nei avanoa ma e to'atele foi ua aumau nei i o latou nofoaga fa'apaionia, ae maise lava i totonu o latou lava laufanua ae faapea foi i le tulaga fa'avaomalo ua va'aia nei foi lona fa'atuputupula'ia. E pei ona matou fa'amoemoe iai, o se tasi lenei o auala e fa'aalia ai le agaga o le fesoasoania'i o uo i soo se nofoaga. Ua vaaia nei le galulue punouai o fa'alapotopotoga ua ausia le tulaga malosi e lagolagoina le atina'eina o isi nofoaga – poo se isi kalasa, itulagi, atunuu, e oo foi i isi konetineta – ma ua maua auala eseese ma le fetala'i e ofoina atu ai le fa'amalosiaina ma fa'asoaina

tu'usao a'oa'oga e tusa lava po o le a le mamao. I le taimi lava fo'i e tasi, o alafua faigofie o le fa'amauina o mea o lo'o a'oa'oina i totonu o se kalasa ma fa'asafua atu ina ia mafai ona fausia ai fuafuaga fa'alenu'u po'o so'o se nofoaga lava, ua fa'agaioiaina nei i le loaloa o nofoaga. Ua fa'afiafiaina i matou i le va'ai atu ua ave le fa'amamafa i le a'oa'o pe fa'apefea ona si'itia le tulaga o lo'o fa'atinoina ai gaioiga a le polokalame fa'alea'oa'oga. A o'o ina maua'a le polokalame fa'alea'oa'oga i totonu o se fa'alapotopotoga e matua maoa'e lava suiga e tulai mai ai. E fai ma fa'ata'ita'iga le molimauina ai i totonu o nofoaga mata'ituina o gaioiga uluola le iai o le si'itiaga o le va'aiga taula'i o tagata aumau i nei nofoaga o i latou lava e ana le polokalame fa'alea'oa'oga: o le atina'eina auiluma lelei o lenei meafaigaluega o la latou matafaioi aupito sili ona taua. E pei ona iloa lelei o faitotoa o le Fa'atuatuaga e matala lautele pea, ma o loo a'oa'oina e tagata talitonu pe faapefea ona fa'alaeiauina i latou ua saunia e ulufale ma le loto mautinoa. O le savavali fa'atasi ma nei agaga, ma le fesoasoani atu ia te i latou e ulufale i le faitoto'a o se fa'amanuiaga maualuga ma se fiafiaga faapitoa; i soo se nofoaga lava, e tele ni vaega eseese e ao ona a'oa'oina e fa'atatau i lenei taimi taua o le taliaina ma le auai aloaia. Ma e lē na o le pau lena. E ui lava o taumafaiga i le tele o kalasa e faisaofaga atu i le liuaina o le soifuaga lautele o loo iai i se tulaga mu'amu'a, o loo taumafai filifiligā Fono Fa'aleagaga Tau Atunu'u fa'atasi ai ma le lagolago malosi a Konesula e a'oa'o atili pe fa'apefea ona manu a'e nei taumafaiga mai gaioiga mo le fausiaina o fa'alapotopotoga. O fefa'asoa'iga faatatau i le auiluma fa'a-le-soifuaga lautele ma le faa-le-tamaoiga o tagata o lo'o fa'afaileleina i totonu o kulupu o aiga ma i totonu o fa'alapotopotoga, ma o lo'o taumafai foi uo e saili auala e auai ai i talanoaga anoa o loo manu malie a'e i nofoaga taulalata ane.

3. Mai le tele o mea sa matou tolaulauina, e susulu pupula lava galuega a talavou. E mamao lava mai le na'o le taliaina o soo se suiga – e tusa lava po o se suiga e leai sona aafiaga ogaoga tele pe iai foi – ua fa'amaonia o i latou lava o poutu totoa ma le fa'autauta o le Fuafuaga. I nofoaga ua maitauina ai lenei vaaiga a le fa'alapotopotoga fa'asaga i talavou ma fausiaina le si'osi'omaga talafeagai mo lo latou auiluma, ua matua fa'amaonia ai e talavou le tulaga fa'atuatuaina o lo'o fa'aalia ia te i latou. O lo'o latou tala'iina le Fa'atuatuaga i a latou uo ma faia auunaga ma fa'avae a latou so'otaga mafana ma le 'ānoa. O le tele o taimi, e fa'aalia nei auunaga e ala i le a'oa'oina o tamaiti laiti – ofoina atu ia i latou a'oa'oga o uiga tausili ma le fa'aleagaga fa'apea fo'i ma le lagolagoina o i latou ia auiluma i le a'oga. O lo'o fa'ataunu'uina nei e talavou Bahá'í lo matou fa'amoemoega maualuga ia fai ma o latou matafaioi fa'apa'iaina le atina'eina o le polosesi fa'alea'oa'oga.

4. O nei taumafaiga uma o loo fa'atinoina i totonu o se augatupulaga matuā lē mautonu ma le femoumoua'i. E i ai le malamalama'aga lautele o fa'atulagaga uma o loo i ai i nei onapo i le sosaiete ua lē talafeuga lea e tali atu ai i manaoga o tagata soifua i ana tauiviga i le taimi nei. O le tele o vaega sa manatu e maumausalī ma e lē maluelue ua fesiligiaina nei, ma ua tupuga mai ai se fa'anaunauta'iga mo se vaaiga mamao autasi. O le tu'ufa'atasiga o leo e lagolagoina le tafatasi, avanoa tutusa ma le amiotonu o lo'o fa'aalia mai ai le toatele o tagata latou te momo'o i nei fa'amoemoega mo lo latou

sosaiete. O le mea moni, e lē o se mea fou i se tagata mulimuli i le Matagofie Fa'apa'iaina le fa'anaunau o loto i mataupu fa'avae fa'aleagaga ua la folafolaina mo tagata e manatunatu i ai. E lē fa'aitiitia ai lo matou maofa, e ui sa tau lē manino pe fa'ape'i le auiluma fa'atasi o tagata soifua i le la tausaga e tasi ua tuana'i atu, ae sa susulu pupula le malamalama o le Fa'atuatua i ni koneferenisi e silia a'e ma le sefulu afe sa auai ai le latalata i le tasi ma le afa miliona tagata, sa taula'i lo latou vaai i auala e fa'asalalauina ai nei lava mataupu fa'avae fa'aleagaga. O le vaaiga mamao a Bahá'u'lláh ma Ana poloa'iga i tagata soifua e galulue fa'atasi mo le lelei auiluma o le lalolagi, sa avea lea ma ogatotonulemu na fa'atasitasi ai ma le naunauta'i ituaiga eseese uma o le sosaiete – a leitioa foi saunoa 'Abdu'l-Bahá, "O soo se fa'alapotopotoga lava o le lalolagi e mafai ona latou mauaina le fa'ataunu'uga o o latou fa'amoemoega maualuluga i nei A'oa'oga Fa'aleatua". O nisi o tagata alolofa i le lalolagi o tagata soifua e ono tosina muamua mai i le fa'alapotopotoga Bahá'í o se nofoaga e sulufa'i iai, o se malutiaga mai se lalolagi fevaevae'i ma le leai o se ola. Ae i tua atu o lenei malu, o le a latou maua ai agaga o lo'o galulue e faapei o se aiga se tasi e fausia se lalolagi fou.

5. E tele vaega e fia fa'amatalaina e fa'ataua i le loaloa o nofoaga eseese o le lalolagi sa fa'atinoina ai nei koneferenisi, o le tuleiga maoa'e sa o latou u'unaia ai lenei Fuafuaga fou, po o le fa'aaliga faagaetia loto o le olioli ma le naunauta'i sa o latou totonu i loto o i latou sa auai. Ae i ni nai fuaiupu e matou te fia fa'amamafaina ai le tulaga na atagia mai i nei koneferenisi e fa'ataua i le atina'eina o le Fuata'iga. Sa o latou fa'aatagiaina mai se fa'alapotopotoga Bahá'í e taulai la latou vaai i le lalolagi o se aiga e tasi, e aunoa ma se fa'aeseeseina o tagata. O lenei vaaiga sa fa'afaigofie ai ona fefa'asoa'i i le Fuafuaga Iva Tausaga i nei faatasiga lea sa tatalaina mo so'o se tagata e fia auai. Sa mafai ai e uo ona manatunatu fa'atasi ma isi faapea ma aiga i manaoga o lenei Fuafuaga i totonu o o latou lava sosaiete, ae le gata i lea o le auai ai o ta'ita'i o nu'u faapea foi i latou o loo iai le pule. O le aumai fa'atasi o le toatele o tagata i se nofoaga se tasi na fa'afaileleina ai se si'osi'omaga mo se talanoaga fa'afouina ma le si'itiaina e fa'ataua i le auiluma fa'aleagaga ma le fa'alesoifuaga lautele o tagata, ma o se talanoaga o loo fa'atinoina i le loaloa o le lalolagi. O le sao fa'apitoa o nei fa'atasiga – saoloto ma tatala fa'alaua'itele, fa'agaetia agaga ma le fa'atumuliaina i ni fa'amoemoega maualuluga – i se mamanu fa'alauteleina o le atina'ega o fa'alapotopotoga i totonu o se kalasa, o se lesona taua lea mo tinopulea Bahá'í uma e ao ona mafaufau i ai mo le lumanai.

6. Ma o lenei la ua ulufale atu le vaega'au a le au fa'atuatua i le tausaga lona lua o le Fuafuaga ma se va'aiga taulai fou ma se malamalamaaga loloto i le taua o le fa'amoemoega o loo latou taumafai e ausia. Pe o le a se vaaiga i gaioiga eseese pe a silasila iai ma le malamalama lelei i le mana-fausia o sosaiete o loo latou faamatuuina atu! O lenei vaaiga lautele e mafai ai e se galuega fa'aauuina faifaipea ona auiluma e aunoa ma se vaaiga o se auunaga tutoatasi po o ua na o se fuainumera lava. Mai lea nofoaga i lea nofoaga, o galuega o loo fa'atinoina ai, o lo'o atagia mai ai se faitau aofai o tagata o lo'o a'oa'o pe fa'apefea ona si'itia o latou lava agava'a e tauaveina le

matafaioi o le sailia lea o le ala mo lo latou lava auiluma manuia. O le liuga fa'aleagaga ma suiga o le soifuaga lautele o le a tulai mai o le a fa'apena lava ona atagia mai i le soifuaga o tagata i le tele o auala eseese. I le fa'asologa o Fuafuaga ua mavae atu, sa atagia manino mai ai i gaioiga mo le fa'alauteleina o le a'oa'oina fa'aleagaga ma mafutaga fai fa'atasi mo talotaloga. I lenei fa'asologa fou o Fuafuaga, ua mo'omia ai nei ona ave le fa'amamafa i isi polosesi o lo'o taumafai e sailia auala e siitia ai le soifuaga o le fa'alapotopotoga – e fai ma fa'ata'ita'iga, o le siitiaina o le soifua maloloina o tagata lautele, o le puipuia o le si'osi'omaga, po o le fa'aaogaina tataua lea ma le talafeagai o le malosiaga o loo i faiga fa'atufugaga, taleni ma faiva alofilima. Ina ia mafai ona siitia auiluma nei vaega felagolagoma'i eseese o le soifuaga o le fa'alapotopotoga e moomia ai ona siitia agava'a e auai ai i se polosesi fa'atulaga lelei faifaipea o le a'oa'oina mo nei vaega eseese uma – o se agavaa e maua mai lea i le su'esu'eina o manatu loloto o lo'o fa'aalia mai i A'oa'oga atoa ma tu'ugaoa o le potofa'aletagata o lo'o fa'atuputupula'ia pea e ala i sailiiliga fa'asaienisi. A'o fa'atuputupula'ia lenei agavaa, o le a tele foi ni fa'aeaga o le a ausia i le faitau fia-sefulu tausaga o fotua'i mai.

7. O lenei va'aiga mamao lautele mo le fausiaina o le sosaiete e iai ona fa'amoemoega e lēmafuitiaina le tele. O fa'alapotopotoga uma lava taitasi o lo'o latou savalia lo latou lava ala mo lona fa'ataunu'uina. O le auiluma o le tasi nofoaga e vaaia ai elemeni e tutusa lelei ai ma le auiluma o le isi. O se tasi o nei elemeni o le fa'afaiileina lea o tualumaga e talafeuga lelei mo le manu a'e o se Mashriqul-Adhkār i se taimi talafeagai e pei ona matou tu'uina atu i le Risivani 2012, ao fa'atuputupula'ia pea agava'a, ma fa'ateteleina malosiaga o le fa'alapotopotoga i le tulaga fa'a-le-nu'u ma le fa'a-le-atunu'u. E pei ona matou fa'ailoa atu i la matou feau i le Risivani ua tuana'i atu, o le a matou filifilia mai i lea taimi i lea taimi nofoaga o le a fa'atuina a'e ai se Malumalu Tapua'i Bahá'í. E matou te fiafia e vala'auina i lenei taimi le fa'atuina o Malumalu Tapua'i fa'alenu'u i Kanchanpur, Nepal ma Mwinilunga, Zambia. E faapea foi ona matou vala'auina le fa'atuina o Malumalu Tapua'i Faa-le-atunu'u i Kanata i totonu o lafanua o le Hazíratu'l-Quds Fa'a-le-atunu'u ua autausagā nei ona fa'avaeina i Toronto. I le lumanai, o nei poloketi fa'apea ma isi, o le a faamanuiaina mai le lagolago e tuuina atu e uo mai soo se laueleele, i le Foa'i Fa'apitoa mo Malumalu Tapua'i,

8. E lē-mafaitaulia le anoanoa'i o fa'amanuiaga ua filifilia e le Alii alofa tunoa e faatotōina ifo i luga o Ana pele. E maualuga lenei vala'auina, ma e ofoofogia le matagofie o lenei avanoa. E utiuti le taimi o loo vala'auina iai tatou e auauna ai. O le ala foi lea o le fa'atagitu'i ma le fa'anaunau o talosaga o loo matou fa'atoga ai, e fai ai matou ma outou sui, mo a outou taumafaiga lē-faalogologotigā i le Loa o Bahá'u'lláh.

[Maota Aoao o le Fa'amasinogatonu]